

光緒江西通志

江西通志卷一百五十一

列傳十八

撫州府一

陳

周敷字仲遠臨川人爲郡豪族敷形貌眇小如不勝衣而膽力勁果超出時輩鄉黨少年任氣者咸歸之侯景之亂鄉人周續合眾以討賊爲事梁內史始興藩王蕭毅以郡讓續續所部有欲侵掠殺者敷擁護之親率其黨扞送至豫章時觀甯侯蕭永長樂侯蕭基豐城侯蕭泰避難流寓聞敷信義皆往依之敷愍其危懼屈體崇敬厚加給卹送之西上俄而續部下將帥爭權殺續以降周迪迪素無簿閥恐失眾心倚敷族望深求交結敷未能自固事迪甚恭迪大憑仗之迪據臨川之工塘敷

鎮臨川故郡侯景平梁元帝授敷甯州刺史封西豐縣侯陳武帝受禪王琳據有上流余孝頃與琳黨李孝欽等共圍周迪敷助迪迪擒孝頃等敷功最多熊曇朗之殺周文育據豫章將兵襲敷敷大破之曇朗走巴山郡敷因與周迪黃法氈等進兵屠之王琳平授散騎常侍豫章太守時南江酋帥竝顧戀巢窟唯敷獨先入朝天嘉二年進號安西將軍令還鎮豫章周迪以敷素出已下超致顯貴深不平乃舉兵反遣弟方興襲敷敷大破之仍從都督吳明徹攻破迪禽方興再遷都督南豫州刺史迪又收餘眾襲東興文帝遣都督章昭達征迪敷又從軍至定川縣與迪相對迪給敷求還朝欲立盟敷許之方登壇爲迪所害諡曰脫子智安嗣位至太僕卿

南史 謹案周敷黃法氈林志訛作梁人白志謝志改
題南北朝今據南史陳書改書陳人又林志列入建昌
白志據史
削改從之

黃法氈字仲昭巴山新建人少勁捷有膽力步行日三
百里距躍三丈梁侯景之亂於鄉里合徒眾太守賀詡
下江州法氈監知郡事陳武帝將踰嶺入援建業命周
文育屯西昌法氈遣兵助文育出屯新淦侯景黨于慶
來襲新淦敗之敬帝卽位封新建縣侯割江西四郡置
高州以法氈爲刺史鎮巴山蕭勃歐陽頤來攻法氈破
之以功授平南將軍又與周迪共平熊曇朗天嘉三年
周迪反法氈與吳明徹討平迪廢帝大舉北伐以法氈
爲都督出歷陽進兵合肥降之加侍中改封義陽郡公
豫州刺史鎮壽陽卒贈司空諡曰威

南史 白志舊案
巴山新建六代地

名詳見元和郡縣志陳劉新淦屬巴山郡隋開皇中廢入臨川卽今之撫州府也吳少帝二年分臨汝爲新建縣梁改曰巴山卽今撫州之崇仁縣與南昌府新建相距數百里今之新建宋太平興國中始從南昌縣析置法旣乃梁陳時巴山郡之新建人史傳自明何得刪去巴山二字移作南昌人物舊志及豫章書如此遷就牽合者不一
今考正

唐 南唐 附

張頂臨川人隱居不仕大中閒蔡京守郡游放生池有乘小舟釣者使詰之釣者口授一詩云拋卻長竿捲卻絲手攜蓑笠詠新詩臨川太守清如鏡不是漁人下釣時蔡曰此必張頂也亟物色之遂遁又顏魯公傳有臨川進士楊志堅能詩魯公敬禮之然郡志唐以前無考矣
人物志

陳徽字彥明臨川人獻皇王興化十論後主欲官之辭

不受歸隱本鄉賜號華蓋白衣處士

人物志

宋

樂史字子正宜黃人母夢異人令吞五色珠而生史有文辭初仕江南爲祕書郎歸朝舉進士佐武成軍上書言事擢著作佐郎知陵州獻金明池賦召爲三館編修遷著作郎直史館轉太常博士知許黃二州又知商州積官至職方員外郎卒年七十八史嘗編寰宇記二百卷其他雜編又四百九十餘卷自爲文百卷

東都事略

案林志以樂史爲崇仁人自志據史改正謹案崇仁縣志據吳草廬景雲觀記以爲崇仁青雲鄉人附識備考

樂黃目字公禮史子淳化進士知壽安縣上書言邊事真宗召對除直史館知浚儀縣歷度支鹽鐵判官遷太

常博士京西轉運使父卒起復使契丹還爲廣西轉運使改陝西陳堯咨知永興好以氣陵人黃目求解職不許堯咨多縱恣不法詔黃目察之堯咨求罷職徙知鄧州入判三司踰月拜兵部員外郎知制誥遷右諫議大夫知開封府仁宗爲皇太子拜給事中兼左庶子坐事左遷左諫議大夫知荆南府復爲給事中徙潭州代還求外任得知亳州卒年六十五黃目性深沈爲吏以靜勝飾以文雅有文集五十卷雜編六十卷

東都事略

吳敏金谿人淳化進士孝友忠信鄉里稱爲長者子蕃字彥弼讀書好古王安石亟稱之芮天聖二年進士孫頤亦登進士與安石唱酬甚富頤孫臬建炎二年進士累官中書舍人吏部尙書

人物志

王貫之臨川人咸平進士官至主客郎中嘗爲淮南提
刑課田桑修陂渠灌田至五萬九千頃璽書獎諭

林志

吳有鄰崇仁人十歲能詩與兄宗簡齊名咸平進士歷
知鬱林南雄新道四州所至有聲累官尙書都官員外

郎分司南京

人物志

晏殊字同叔臨川人七歲善屬文號神童景德初張知
白安撫江西薦之召試賦論殊自言嘗私習此賦不敢
隱真宗異之因試以他題留之祕閣使讀書爲集賢校
理皇太子舍人擢知制誥真宗每所咨訪多以方寸小
紙細書問之凡所對必以其藁進示不洩章獻皇后權
國事宰相欲獨見奏事殊建言羣臣奏事者太后垂簾
聽之皆無得見議遂定天聖三年以禮部侍郎爲樞密

副使罷留守南京興學校延范仲淹教授諸生天下興學自殊始未幾參知政事章獻謁太廟有請服袞冕者后以問殊殊以周官后服對仁宗親政以殊知江甯府召拜樞密加同中書門下平章事遂以刑部尙書居相位元昊反師出陝西殊數建利害請罷監軍又請出宮中無用之物以佐邊費而財賦之職悉歸有司時范仲淹韓琦富弼皆進用臺閣多一時之賢殊以事罷仲淹等亦相次去厯知永興軍徙河南府提舉萬壽觀卒年六十三贈司空兼侍中諡元獻殊性剛峻遇人以誠當世賢士大夫如范仲淹孔道輔歐陽修等皆出其門擇壻又得富弼楊察爲文瞻麗尤工風雅有文集二百四十卷又集古今文章爲集選二百卷

東都事略

王益字舜良臨川人祥符進士厯官臨江判官領新淦縣改大理丞知廬陵移知新繁到官除宿姦數人流惡處餘以恩信治常厯歲不管一人改太常博士出知韶州嶺南習於蠻俗男女無別益首嚴治之未幾男女之行者別塗胡瑗采其事入政範官至都官員外郎贈楚國公

人物志 謹案益子七人安仁安道安石安國安世安禮安上見曾文定墓誌

李陽孫字祖德崇仁人慶厯二年三禮出身主封州簿官滿挈妻子徒步歸旻殊深器重之官至殿中丞著有

挂冠集

林志

裴煜字如晦臨川人慶厯進士嘉祐中爲禮官詳定祠禮又奏國忌與大祀同日樂備而不作固忌日必哀之義然樂以降格神祇非以適一己之私也按開元中裴

寬上議廟尊忌卑則作樂廟卑忌尊則設而不作中書
張說以寬議爲是請大祠如天地日月社稷與忌同者
皆用樂庶幾輕重不失其稱下集議皆如煜言煜文雅
博洽與歐陽修梅堯臣劉敞酬倡甚密終翰林學士人
志

杜子野宜黃人王安石幼師之及爲相子野來見安石
問所欲但指壁開顏真卿所書東方朔像贊安石曰墨
本何足貴石在河北德州可輦致也併以金帛致之不

受孫育德紹興五年進士

林志

侯叔獻字景仁宜黃人慶厯進士累官兩浙常平使建
議畿內之地可因樊山水灌溉成田遂命叔獻提舉淤
田司兼都水監不數年成良田四十萬頃遷河北水陸

轉運判都水監卒

補志

王安石字介甫臨川人蚤有盛名舉進士高第僉書淮南節度判官召試館職固辭知鄞縣三日一治縣事起隄堰決陂塘爲水陸之利貸穀於民立息以償俾新陳相易邑人便之通判舒州以文彥博薦再召試爲羣牧判官出知常州提點江東刑獄入爲三司度支判官獻書萬餘言極陳當世之務除直集賢院累辭不獲命始就職除同修起居注固辭遂除知制誥神宗卽位除知江甯府召爲翰林學士未幾參知政事安石旣執政設制置三司條例司與知樞密院陳升之同領之而青苗免役市易保甲等法相繼興矣自變法以來御史中丞呂誨等力請罷條例司并青苗等法諫官孫覺李常胡

宗愈御史張戢王子韶陳襄程顥皆論安石變法非是以次罷去前宰相韓琦亦上疏論青苗之害安石稱疾求分司不許三年拜禮部侍郎同中書門下平章事監修國史知制誥呂惠卿修撰經義以安石提舉王韶取熙河洮岷疊宕等州安石率羣臣入賀神宗解玉帶賜之以旌其功慈聖光獻皇后宣仁聖烈皇后間見神宗流涕言新法之不便者且言王安石亂天下神宗亦流涕退命安石裁損之安石重爲解乃已七年神宗以久旱益疑新法之不便遂以吏部尚書觀文殿大學士知江甯府明年復拜同中書門下平章事初呂惠卿爲安石所知驟引至執政洎安石再相苟可以中安石無不爲也會安石子雱卒安石旬奉祠以使相爲集禧觀使

封舒國公又辭使相乃以左僕射爲觀文殿大學士元豐三年改封荆國公退居金陵始悔恨爲呂惠卿所誤哲宗卽位拜司空明年薨贈太傅紹聖初謚曰文配享神宗廟庭崇甯三年配享文宣王廟追封舒王靖康元年停文宣王配享列於從祀後又罷配享神宗廟而奪其王爵初安石提舉修撰經義訓釋詩書周官旣成頒之學官天下號曰新義晚歲爲字說二十四卷學者爭傳習之日以經試於有司必宗其說少異輒不中程安石性强忤遇事無可否自信所見執意不回至議變法而在廷交執不可安石傳經義出己意辨論輒數百言眾皆不能誦甚者謂天變不足畏祖宗不足法人言不足卹罷謫中外老成幾盡多用門下儂慧少年久之以

早引去洎復相歲餘罷終神宗世八年不復召而恩顧

不少衰云

東都事略

白志舊案安石初配享孔廟欽

中魏元履

守太學錄將釋奠先期白宰相請廢王安石

石父子勿祀事見朱子集理宗朝始創王爵斥從祀

王安禮字和甫嘉祐進士第召對神宗欲峻用之以兄
安石當國辭乃爲崇文院校書久之直集賢院出知潤
州移湖州爲開封府判官同修起居注知制誥彗星見
安禮上疏曰和氣致祥乖氣致沴意者執政大臣是非
好惡不遵諸道乘權射利者不察上惠養元元之意用
力殫於溝瘠取利究於園夫殆有以召星變臣願陛下
省不急之改作紓不勝之工力至於祈禳小數貶損舊
章恐非應天以實者進翰林學士知開封府事元豐四
年拜尙書右丞遷左丞尋以端明殿學士知江甯府遷

資政殿學士知青州徙揚蔡二州落職知舒州復資政殿學士再知揚州改永興軍太原府卒年六十二贈右銀青光祿大夫安禮姿貌魁偉有口辨嘗以經綸自任而闊略細謹云

東都事略

王安國字平甫自牝角未嘗從人受學操筆爲文語皆驚人神宗卽位近臣薦其才行爲武昌軍節度推官教授西京國子監召對神宗問安石秉政物議如何對曰但恨聚斂太急知人不明耳神宗默然久之除崇文院校書改著作佐郎祕閣校理初呂惠卿諂事安石安國惡之一日安石與惠卿論新法於其第安國好吹笛安石諭之曰宜放鄭聲安國曰亦願兄遠佞人惠卿深銜之乃因鄭俠獄陷安國坐非毀其兄放歸田里歲餘而

卒年四十七有文集六十卷元祐中復祕閣校理

東都事略

饒竦字異林臨川人初與王安石友善及安石力持新法朝議沸騰竦入見極言更張太驟搖動民心安石不能用熙甯六年下第以詩投安石曰又還垂翅下丹霄歸指臨川去路遙一畝荒田多賣卻要錢準備納青苗卜居玉湖別墅著述自娛元祐閒或勸之出竦曰人非水火不生而蹈水火必死矧滔天熾燄奈何犯之後黨

論大興人服其識

縣志

蔡元導字濬仲臨川人博聞強記與弟元翰共學有市書者過之留數部經宿還之曰吾所熟習也其人請誦之皆然客怒焚其書導笑與之直里人目其所曰焚書邱兄弟試茂才異等科報罷張方平來別曰劉蕡下第

我輩何顏元導應聲曰雍齒且侯吾屬無患後與子承

禧同登嘉祐進士官終南劍州推官

林志

洪渥臨川人家貧以進士從鄉舉有能賦名初進於有司連黜久之乃得官又久不進監黃州麻城之茶場以死不能歸葬亦不能返其孥里中人無賢愚皆恨失之有兄年七十餘渥得官而兄已老不可與俱行渥至官量口用俸掇其餘以歸買田百畝居其兄渥既死兄無子數使人至麻城撫其孥渥兄弟如此無愧矣

南豐集

蔡承禧字景繁元導子嘉祐進士授太平司理擢監察御史面奏呂惠卿怙權任私諸罪特賜五品服上遣李憲往熙河計置邊事諸將聽節制承禧奏曰自古未有以兵寄閹人而不亂者鬼章患小用憲患大不成禍小

事成禍大言甚切直上優容之後出爲淮南轉運使所

著有論語指歸十卷奏議詩文三十卷

人物志

晏幾道字叔原殊第七子能爲文章尤工樂府其小山詞清壯頓挫見者擊節以爲有臨淄公風黃庭堅序之曰叔原固人英也仕宦連蹇而不一傍貴人之門家人飢寒而面有孺子之色人百負之終不疑其欺己至其文上掩騷屈下者亦豈減團扇桃葉哉其所推如此

人物志

鄧孝

一作考

甫字成之臨川人嘉祐進士官至奉議郎提

點開封府界河渠坐事去元符末詔求直言孝甫時年八十一上言熙甯而下權臣迭起亂天下蔡京嫉之遂以謗訕得罪重加貶黜追官羈管筠州崇甯釋逐臣得

歸所論述有卜世大寶龜伊周素蘊義命雜著太平策

要等凡二百五十餘篇

宋史謹案新城縣志以考甫爲渭南弟入新城人物

晏防字宗武殊從子幼學於王安石主崇仁簿轉萬載丞行李蕭然遣家奴致米乃得歸赴調卒於京防寬厚好學安於義命不可榮辱所著有侯門集十卷俱抵集

一卷從子中從姪孫升卿朋曾孫敦復敦臨肅大止曾

姪孫紹休皆進士

謝志謹案謝志載防世系與府志選舉注不合大止選舉表作大正

周袞字彥弼金谿人嘉祐進士以員外郎出知滕州有

惠政孫珩靖康初上書論事不報曹績辟置偕行使北

還當次加賞辭不受歸隱麻姑山號足翁五世孫國華

字直夫治春秋入上舍嘗叩閭言事登嘉定進士

宋史謹

案縣志袞少與王安石友善安石奇其才新法之行以袞鄉人必附己欲引用之議不合復手書極論其害安

石不聽
遂乞外

撫州府

劉蒙字資深黃人治平進士司馬光薦爲御史臺主簿
愿官朝議大夫蒙爲人清潔不可干以私居家友愛
所得蔭補先二弟而後二子鄉里稱之

林志

劉芑字資仲蒙弟舉進士辟廣西經幹屢挫蠻寇遷知

惠州賜詔獎諭官至朝散大夫清節如其兄

人物志

陳遷字德升宜黃人年十六游金陵以強記聞王安石
命與陸佃徧閱蔣山碑無慮數十及歸錄之不遺一字

因病留蔣山究心禪學作續傳錄

人物志

鄒極字適中宜黃人治平進士擢度支員外郎朝廷更
鹽法多求羨餘以希進者極條其不合請補外除江西
提刑親喪服除曰讀書句祿以娛親耳今旣孤可復仕

乎乞祠得洪州玉隆觀自號一翁

林志

陳軾字君式臨川人元豐中知黃州馭吏急而治民寬
郡境稱治時蘇軾謫居於黃人多避禍不敢相親軾獨
與之交以朝奉大夫致仕蘇軾名其園曰中隱軾曰恭
軒王安石曾鞏皆以詩贈

人物志

白志舊案東坡謫黃州時爲守者徐君猷也陳

軾姓名不見於集中人物志不知何據

鄒餘字損道宜黃人元豐進士爲通城令興起學校創
講堂曰資深黃庭堅記之改洛容縣定桂林宜陽疑獄
以邢恕薦除監察御史出爲淮西提舉再入除侍御史
疏辨析元祐諸人大臣不樂遂請祠歸

人物志

季幾復字晞顏臨川人與弟中復俱有文聲號二季元
豐進士知建昌縣歲旱以什伍法計口給粟全活者多

計使錄其式頒行他邑改知崇陽民祠之以配前令張

忠定云

人物志

蔡居厚字寬夫承禧子第進士累官吏部員外郎諫議大夫論東南兵政七弊河北河東盜起太原真定守皆以不能禽捕罪去居厚言將帥之才不儲養於平時故緩急無可用宜令觀察使以上各舉所知改戶部侍郎以徽猷閣待制去有文集十二卷

人物志

黃符字信叔金谿人父慶基嘉祐進士官至監察御史符讀書過目成誦登紹聖進士時初立宏辭科又冠其選仕至祕書郎

人物志

涂大經宜黃人紹聖進士應詔言事請復元祐之政坐是忤時議不得仕於朝宣和末知南昌治水有方遷秩

一等林志

謝逸字無逸臨川人自號溪堂少孤博學工文辭操履峻潔再舉進士不第黃庭堅嘗曰使斯人在館閣當不減晁張李商老謂其文步趨劉向韓愈所著書有春秋廣微樵談其他詩啟碑志雜論數百篇淳熙中繪像祠於郡學林志

謝邁字幼槃逸弟自號竹友嘗爲漕司首薦省闈報罷以琴弈詩酒自娛詩文不亞其兄時稱二謝呂本中云無逸似康樂幼槃似元暉又云二謝修身勵行在崇觀間無所汙染不獨以文見稱林志

過源字道源臨川人少穎異篤志聖賢之學嘗曰論語諸賢宜別類爲一書以無混聖言又謂黃鐘極清一陽

之始當以長孫無忌二寸九分爲據語皆獨悟學者稱

爲浩齋先生

人物志

汪革字信民臨川人紹聖進士分教長沙帥張芸叟從而受學呂希哲見之以比黃憲茅容蔡氏當國欲得知名士附己以周王宮教召不就曰吾異時不欲附名奸臣傳復爲楚州教官卒年四十所著有青溪類稿論語

直解若干卷清熙中祠於學

人物志

李公彥字成科

府志作德

臨川人元符進士累官宗正卿素

爲朱勝非呂頤浩所知及當國公彥引退除兩浙發運使入爲吏部侍郎平居與謝逸曾季狸相倡和有宮詞百餘篇及潛堂詩話文集

人物志

聶昌臨川人舊名山字賁遠入館爲校書郎擢右司員

外郎由直龍圖閣爲湖南轉運副使蔡京爲相召還拜
戶部侍郎爲開封尹以徽猷閣待制出知德安府未幾
落職衡州安置復召還會欽宗卽位除戶部尙書李綱
之罷太學生陳東及士庶十餘萬人搥鼓伏闕下經日
不退府尹王時雍麾之不去山出諭旨相率聽命而退
時雍乞置東等於獄山力言其不可遂止復尹開封時
京師復戒嚴欽宗謂山有周昌抗節之義改賜名昌遂
拜同知樞密院事入謝力陳防秋守禦之策會金人再
議和割兩河須大臣報聘詔耿南仲及昌往昌言兩河
之人忠義勇勁萬一不從必爲所執死不瞑目矣儻和
議不遂乞以便宜遣屬官分道提勤王之師入衛欽宗
許之昌卽日就道行次永安軍與金兵遇粘罕盛陳兵

衛以待其舍人止昌徹繳用勝子贊名引見國相昌不可爭移時乃以客禮見粘罕既南行命楊天吉以千兵館昌往河東耿南仲往河北明日昌與其屬劉岑滕牧分道而行凡八日至絳州絳人不奉詔遂見殺年四十九昌爲人疏俊遇事敢爲喜周人之急然恩怨太明睚眦必報以喜怒用刑贈觀文殿大學士諡忠謝志敏史陸賀字道卿金谿人其先世吳郡祖德遷五代末避亂來金谿累世同居傳四世至賀尤篤於義方采司馬氏冠婚喪祭之禮著爲家法持躬踐行爲鄉國所宗子六人九思九敘九皋九韶九齡九淵以子貴贈宣教郎傳至孫冲凡十世幾二百年合爨如故咸熙開詔旌其門

晏孝廣殊曾孫政和七年以薦補揚州尉建炎三年二月詔劉光世將兵阻淮距金光世兵潰走還粘沒陷天長軍高宗倉皇出奔金騎直追揚州城下追至楊子橋孝廣洒泣誓眾率所糾土兵禦之帝乃得馳至瓜州渡鎮江得脫孝廣轉鬪以援兵不繼戰死

縣志

黃彥遠字思邈金谿人政和進士常爲平江府教睦寇偏境官吏宵遁母饒遣人勉之曰忠孝不兩立汝當死職勿吾憂彥遠率士民城守賊不敢犯丁艱哀毀成疾隱居東庵多著述有五經指南運氣要覽東庵文集等

書林
志

崔縱字元矩臨川人政和進士厯確山主簿仙居丞累遷承議郎幹辦審計司二帝北行高宗將遣使通問廷

臣以前使者相繼受繫莫肯往縱毅然請行乃授朝請大夫右文殿修撰試工部尙書以行比至首以大義責金人請還二帝又三遺書責之金人怒徙之窮荒縱不少屈久之金人許南使自陳而聽其還縱以王事未畢不忍言又以官爵誘之縱以恚恨成疾竟握節以死洪皓張邵還遂歸縱之骨詔以兄子延年爲後

宋史

歐陽澈字德明崇仁人尙氣慷慨善談世事憂國閔時出於天性靖康初應制條弊政陳安邊禦敵十策州未許發退而復采朝廷之闕十事爲書上聞已復論列十事爲三巨軸廢置卒辭不能舉州將爲選力士荷之以上會金人大入要盟城下而去澈聞徒步走行在高宗卽位伏闕上封事極詆大臣遂與陳東同見殺年三十

有七許翰在政府聞斬陳東歐陽澈遂力求罷爲東澈
著哀辭澈所著飄然集六卷會稽胡衍既刻之豐城范
應鈴爲立祠學中

宋史白志舊案高宗建炎八年贈

枯封其母羅氏夫人賜田十頃以贍祭養其制詞曰使
汝澈不得爲良臣猶得爲忠臣如天下後世將謂朕何
朕八年於茲一食三嘆而不能已也通階

美職豈足爲恩聊藉以塞子哀以彰予過

鄧輈字國驂崇仁人靖康閒以布衣言事不合歸隱先
是邑西北境山險多盜輈謂卽其地立縣乃可止言於
邑丞張詠白計使聞於朝創樂安縣盜遂息自號陋室
有文集二十卷

人物志

郭若虛字仁實崇仁人讀書通大義重然諾建炎初金
入江西遣將肆掠若虛率鄉社格之七里岡梟其首將
眾怒復來攻逆鬪於會原嶺兩晝夜若虛及鄉社死者

七人金兵喪亡無數懼而遁邑免於寇

林志

葛賡字德載金谿人建炎閒王世雄叛卒至郡眾皆恟懼賊有髯而騎者賡投戈擲之墮馬賊驚潰獲其正使告身鄉人欲上其事賡曰吾志於除賊無意論功有司亦莫省子逢時字才美乾道進士

林志

晏敦復字景初丞相殊之曾孫第進士爲御史臺檢法官紹興初出知貴溪縣改通判臨江軍召爲吏部郎官左司諫權吏部侍郎詳定一司敕令渡江後庶事草創凡四選格法多所裁定敦復素剛嚴居吏部請謁不行銓綜平允除給事中居右省兩月論駁凡二十四事議者憚之復爲吏部侍郎金遣使來要以難行之禮詔侍從臺諫條奏所宜時秦檜方力贊屈己之說外議羣起

計雖定而未敢行句龍如淵說檜宜擇人爲臺官使擊去異論於是如淵施廷臣莫將皆據要地人皆驚愕敦復同尙書張燾上疏言前日如淵以附會和議得中丞今施廷臣又以此躋橫榻眾論沸騰方且切齒莫將又以此擢右史乞加斥逐杜羣枉門力爲自治白彊之策旣又與燾等同班入對爭之檜使所親諭敦復曰公能曲從兩府地旦夕可至敦復曰吾終不爲身計誤國家況吾薑桂之性到老愈粹請勿言卒不能屈始檜拜相制下朝士相賀敦復獨有憂色曰姦人相矣未幾權吏部尙書兼江淮等路經制使尋以寶文閣直學士提舉亳州明道宮閒居數年卒年七十一

宋史

程時翼字勤道崇仁人家貧授徒或累月食無鹽不妄

交與以晚科爲始與尉交廣多盜單騎往諭禍福皆復爲平民在官六年下不敢欺鄧輸爲作卓行傳

人物志

饒子儀字元禮臨川人從胡瑗孫復授經親沒不事科舉楊傑授以星厯諸書莫不洞究結庵凌雲山名曰葆光杜門著書臨江守王說欲迎致軍學郡守劉公臣曰吾州有士如此令他之可乎乃迎還躬率諸生聽講說崇甯初詔舉懷才抱藝養素邱園之士郡以子儀應詔所著編年史要陳瓘爲之序謂其事核旨密有補於聖經又有周易論語解及詩文集

人物志

雷度字世則臨川人器識高遠靖康初爲舉首然無意利祿築庵題曰卷石晚研精於易有書易口義文集八

卷

林志

王棣字儀仲安石族孫學士雱無子荆公立爲後崇觀間爲顯謨閣待制知開德府金人寇澶淵城陷遇害贈

資政殿大學士賜葬貴溪之舒山

林志

吳沆字德遠崇仁人幼孤事母孝博通經史政和閒與弟澥各獻書於朝不用歸隱環溪號無莫居士紹興中舉不求聞達者郡以沆應詔所著有易論語發微老子

解環溪集環溪詩話

林志

汪莘字叔野草弟篤學有志喜爲歌詩東萊諸呂豫章諸洪競稱之登建炎二年丙科歷洪州司理舉清白第一所著曰歸愚集從子大經字淳夫博學多聞嘗哀溪堂師友尺牘及著臨川耆舊傳

人物志

鄧粦字子澤金谿人建炎之亂郡邑知粦壯勇檄爲忠

義巡社都統傅安潛副之朝廷命隸安撫司募練鄉兵
成勁旅稱鄧社王世雄攻郡雩力戰解圍上級千五百
餘饒中立掠饒州雩助鄒大捷大盜楊惟中亂奉詔募
兵無應者雩慷慨受命斬其渠帥龐正俘惟中王九二
掠貴溪李端仁攻宜黃悉討平之紹興元年擊潘逵於
仙巖馘渠劉四劉五禽李斯成王大尉謝枋得爲作忠

義社傳

府志

傅安潛字顯夫金谿人建炎閒與鄧雩同起義社結寨
韓婆嶺鄧椎牛誇示拳勇安潛以五指撚竹爲薪不藉
斧斯至今傳韓婆產竹胞而可揉其遺迹也鄧社保東
北傅保西南年八十二赴召入京猶躍馬揮戈稱爲嬰
鏢卒無子以甥黃根爲繼根亦材武年十八救父重圍

安潛歿遺腹生子植根撫之長繼父職安潛祀忠義祠

府志

李浩字德遠其先居建昌遷臨川浩早有文稱紹興十二年擢進士第調饒州司戶參軍襄陽觀察推官繼以太常寺主簿兼光祿寺丞自秦檜用事塞言路至是命百官轉對浩與王十朋馮方查籥胡憲始相繼言事聞者興起孝宗卽位以太常丞召兼權吏部郎官踰年浙河水災詔郎官館職以上條時政闕失浩指論近臣反覆數千言除司農少卿會大理奏結他獄上顧侍臣曰棘寺官安得剛正如李浩者遂除大理卿廣西安撫缺尙書郎入奏論及擇帥事上曰廣西朕已得李浩矣治廣二年召還除權吏部侍郎時政府有怙寵竊柄者黨

與非一自浩之入已相側目浩中立不倚於是謀嫉去

之提舉太平興國觀出帥夔部踰年卒年七十一

宋史

陸筠字元禮金谿人紹興進士倖江陵張栻薦之轉江

西帥司參議奉祠官至朝奉大夫賜金紫著翼孟音解

九十一條發揮春秋左氏傳莊列楚辭西漢書說文之

存古者深思考互以成此編周必大序之

人物志
案撫州府志

筠賀從孫博習修潔登紹興十五年第復齋行長而年

少甫成童嘗從學其志於道實自筠發之嘗過豐城因

爲豐城人

管鑑字明仲臨川人以父澤補官佐湖南帥劉珙平劇

盜以功累遷至廣東提刑經略安撫使在湖南勸民濬

陂池溉田萬六千頃蠲郴州和羅新石鼓書院在廣東

減潮惠七郡丁租置廣安宅買田以給士大夫南遷不

能還者

人物志

吳漸字茂榮臨川人性孝弟與人多謙恭不詭隨識陸九淵於童幼妻以女

林志

過助字紹古源從孫博覽能文性至孝沒葬於崇仁高富嶂人呼過至孝墓有通神集三十卷收入祕閣

人物志

陳孺字漢卿臨川人紹興進士除祕書省正字忤秦檜劾去後知處州有異政將滿值歲旱民遮道乞留孺捐俸置贍民倉是歲饑而不害除福建運判閩盜起孺董師討之馘其渠魁餘黨皆潰移師江陵中道卒平生慷慨有大節

人物志

黃兌字悅道臨川人紹興進士嘗獻美芹十策進取四論歷官守南雄陞辭三劄論政事得失言甚切直持身

清廉年未七十致仕官至朝議大夫臨川縣開國男

林

王珏字德全臨川人安石裔孫紹興二年起家鹽官承

秀州歲以錢給亭民煮鹽至十五年積十九萬七千餘

緡不給民訴於朝除珏爲浙西茶鹽提舉逾年盡給且

贏鉅萬開華亭海河二百餘里鹽益流通且資以溉田

經界法行除其害者三百六十餘事其七千二百餘戶

爲尤病珏奏除之兼提點刑獄移湖南提舉官至直敷

文閣太府少卿

人物志

胥作霖字澤民宜黃人儀狀魁偉南渡初盜瞰臨川作

霖喻里中少年以禍福莫不俯首聽命未幾叛卒王世

雄之黨焚崇仁掠宜黃作霖選壯士百餘伐木柵臨口

伺其至持槌鼓譟縱擊賊宵遁事聞辟爲縣尉不就

林

何異字同叔崇仁人紹興進士調石城主簿歷知萍鄉
縣遷國子監主簿轉對擢監察御史時光宗愆於定省
異入疏諫不報約臺官聯名言姦人離開父子當明正
典刑又不報旬外授湖南轉運判官攝帥事尋爲浙西
提點刑獄以太常少卿召改祕書監兼實錄院檢討官
權禮部侍郎太廟芝草生韓侂冑率百官觀焉異謂其
色白慮生兵妖侂冑不悅出知夔州兼本路安撫移知
潭州乞閑予祠者再嘉定元年召爲刑部侍郎五月不
雨異上封事明年權工部尙書告老卒年八十有一異

高自標致有詩名所著月湖詩集行世

宋史

吳曾字虎臣崇仁人由上舍獻書授官累遷至吏部郎
中太史局欲徙紹興殯宮內士民墳墓曾謂坤道尙靜

恐傷旺氣事得止又言辛巳壬午歲俱日食三朝當主
兵請豫爲備除知金州改嚴州致仕所著有君臣論負
暄策毛詩辨疑左傳發揮新唐書糾繆得間文集待試
詞學千一策南征北伐編年南北事類能改齋漫錄近
二百卷悉收入祕府

人物志

謝源字資源邁孫以進士得官初爲建昌軍學教授復
改江州學改南昌縣丞修江西圖經再調鄒武丞常
平使者知其賢交章薦之命下而卒其詩秀潤和雅存
者百餘篇名空齋詩藁

朱子集

吳編字仲權曾從弟隆興進士知義章縣興建學校風
俗爲之一變召試除正字輪對愷切上爲改容知武岡
軍創社倉八十餘所復以司封郎中召入對極言御批

除日之弊出爲湖南轉運司以敬名齋張栻爲之記有

雲巖集

林志

曾季狸字裘父臨川人鞏弟宰之曾孫師事呂居仁又與朱子張栻遊栻被召季狸戒其不當談兵且勸以范文正忠宣父子爲法郡守張孝祥樞密劉珙薦於朝皆謝不起自號艇齋陸游序其集

人物志謝志舊案曾季狸林志認爲南豐弟

白志改正

管湛字定夫鑑子累官至金部郎中除廣西提刑兼經略安撫區處橫山羅甸蠻人帖服代百姓輸上供麥秋苗爲絹鉅萬三遷至大理少卿有定齋類彙甲乙集從弟瀛以蔭補官平戍卒亂以功加廣西提刑予祠

人物志

謹案湛從弟瀛安白謝志均誤作姪縣志湛與瀛俱附見管鑑傳故稱子湛姪瀛湛傳附瀛當作從弟今據縣

正志

吳泮之弟隆興進士以薦召對除太學錄改西外宗教授所著有字內辨疆域志等書

林志

陸九思字子疆金谿人父賀生六子九思居長舉進士弟九淵之始生也鄰人有求抱養爲子者九思適生子語妻曰我子付田婦乳爾當乳小叔妻忻然從之九淵既長事兄嫂如父母朱子嘗跋其訓飭子弟語以爲式

人物

志

蔡孝恭字莊叔元導孫幼從舅父吳虎臣游博聞強記葉適洪邁以賢良薦上批鱗十三策甫至京師或謂曰賢良高選合謁當路孝恭曰以孤媚取科第吾不能遂歸部使郡守造其廬皆不往爲建招賢坊

林志

陸九皋字子昭九思弟舉進士率諸弟講學從游者多有聞九淵爲靖安時九皋勉以書曰吾曹不可見戲度日視聽言動之際三千三百之微不可不察若只主張見在正恐道無時而備德無時而盛仁無時而熟自號庸齋晚以恩授修職郎

人物志

王謙字弱翁臨川人隆興進士通判澧州入爲將作監簿每對必指切貴近江浙饑推行荒政多所全活除湖北提刑乞祠歸謙性剛方所至忤大吏立朝忤時宰羅點爲兵部尙書薦謙自代不報

人物志

嚴思義字仲和臨川人乾道進士攝湘鄉以薦知隨縣升甯國府倅淮民流徙者賴全活孫象祖字子文紹定進士授吉州判官有拙逸雜著友竹詩平心集

人物志

陸九韶字子美其學淵粹隱居山中書之言行夜必書之其家累世義居一人最長者爲家長一家之事聽命焉歲遷子弟分任家事凡田疇租稅出內庖爨賓客之事各有主者九韶以訓戒之辭爲韻語晨興家長率眾子弟謁先祠畢擊鼓誦其辭使列聽之子弟有過家長會眾子弟責而訓之不改則撻之終不改度不可容則言之官府屏之遠方焉所著有梭山文集家制州郡圖

宋史

陸九齡字子壽父賀以學行爲里人所宗九齡其第五子也稍長補郡學弟子員時秦檜當國無道程氏學者九齡獨尊其說歸家從父兄講學緝閱百家晝夜不倦悉通陰陽星厯五行卜筮之說入太學司業汪應辰舉

爲學錄登乾道進士調桂陽軍教授以親老改興國軍
未上會湖南茶寇剽廬陵聲搖旁郡人心震懾舊有義
社以備寇郡從眾請以九齡主之寇雖不至郡縣倚以
爲重及至興國地濱大江俗儉嗇而鮮知學九齡不以
職閒自佚勸綏引翼士類興起不滿歲以繼母憂去服
除調全州教授未上得疾卒贈朝奉郎直祕閣諡文達
著有復齋集

宋史

吳榮字茂卿宜黃人乾道進士通判南安軍郡有疑獄
久不決卒平反之人稱神明前後凡三宰繁劇每語人
曰爲政之道平易近民而已歷仕四十年以循良稱自
號深簡老人

林志

曾丰字幼度樂安人乾道進士仕至郡守以文章名有

緣督集行世晚年無意仕進築室以詩酒自娛

林志

李郭字子經宜黃人觀書一覽輒記爲文援引浩博不能就有司程度嘗著比事罪言三十篇徧游江淮人號爲書廚著文集數十萬言有緯文瑣語

林志

黃希字夢得宜黃人登進士官永新令嘗作春風堂於縣治楊萬里爲之記有補注杜詩搜剔隱微皆前人所未發子鶴續成之鶴字叔似著北窗寓言集

人物志

陸九淵字子靜生三四歲問其父天地何所窮際父笑而不答他日讀古書至宇宙二字忽大省曰宇宙內事乃己分內事登乾道進士初調靖安縣主簿丁母憂服闋改建甯崇安縣以薦除國子正教諸生無異在家時除敕令所刪

謝志誤制

定官未幾主管台州崇道觀還鄉學

者輻輳稱象山先生光宗卽位差知荆門軍民有訴者
無早暮皆得造於庭爲酌情決之多所勸釋其有涉人
倫者使自毀其狀以厚風俗惟不可訓者始寘之法荆
門爲次邊而無城九淵以爲郡居江漢之間爲四集之
路南捍江陵北援襄陽東護隨郢之脅西當光化夷陵
之衝荆門固則四鄰有所恃否則有背脅腹心之虞乃
請於朝而城之罷關市吏譏察而減民稅商賈畢集稅
入日增每旱禱卽雨郡人異之丞相周必大嘗稱荆門
之政以爲躬行之效一日告僚屬曰某將告終會禱雪
迺沐浴更衣端坐後二日日中而卒會葬者以千數諡
文安初九淵嘗與朱熹會鵞湖論辨所學多不合及朱
守南康九淵訪之朱與至白鹿洞九淵爲講君子小人

喻義利一章聽者至有泣下朱以爲切中學者隱微深
痼之病至於無極太極之辨則貽書往來論難不置焉
門人楊簡袁燾舒璘沈煥能傳其學

宋史

俞廷椿字壽翁臨川人乾道進士使金還差江西安撫
司幹官會大治縣奸民盜鑄因緣生變奏爲節制軍馬
廷椿廣布耳目以所獲盜爲鄉導凡十八日平之僦
有大志而廉介自將自北還因紀次其道路所經山川
人物與夫言論事物之可備采用者爲北轅錄又考周
禮以司空散在五官先儒汨陳之著復古編行於世

志

張英甫名孝直臨川人從陸九淵游有易詩書語諡中
庸口義五十餘篇名曰尊經又有要言渾象原意雜詩

林志

劉堯夫字滄叟金谿人乾道己丑太學釋褐時號走馬上舍除國子正遷太博陞對極言時相之失且言天子有私人則外庭有具位公朝有他徑語甚切直著有井齋集

人物志

孟渙字濟父臨川人以恩補官再中淳熙進士厯知荆門軍奏削馬梁厯口新店二稅存其一蠲無名茶租遷運判奉祠

林志

彭興宗字世昌金谿人淳熙十四年訪舊於貴溪應天山麓張氏因登山游覽見陵高谷邃林茂泉清乃與諸張議結廬迎陸九淵講學其上九淵登而樂之因山形如巨象改名象山興宗與周元忠等數十人俱在山中

結廬從學興宗嘗訪朱子於建安朱子以詩送其歸山云象山聞說是君開雲木參天響隱雷好去山頭且堅坐等閒莫要下山來詩題稱丙辰正月三日蓋其時趙汝愚已謫戍韓侂胄攻僞學方急也是年朱子以沈繼祖劾落職又著僞學籍五十九人九淵弟子袁燮楊簡皆在焉興宗獨訪之不以禍患爲意

縣志

林夢英字叔虎臨川人淳熙進士知武陵縣太守延致郡庠誨諸生聞者感發通判靖州討平峒蠻知武岡軍未上除祕書丞權司封奉祠歸居城西金石山建樓讀書年踰八十寒暑不輟人稱山房先生

人物志

晁伯談字元默詠之曾孫家臨川淳熙進士主管官告院時權臣開邊輪對言內修不可忽大舉不可輕當進

剛正士以強本朝知南康軍陞辭又以修戎器飭邊備
爲言再知道州入仕四十年家無餘財有帶川集二十

卷

人物志

孫洵字子直臨川人後以字爲名改字直翁淳熙進士
屢辟制幕除官告院乞外得衢州搜括隱賦不畏強禦
南安擇守上曰向有所盜兩晴者爲誰宰執以對遂命
之期年卒於官郡士民肖像立祠乞賜額所著有兩漢
晉唐文選略又仿晏殊類要作谷董一編初洵父名彥
爲郡吏治獄設三餅減一囚罪則投一錢於餅中以錢
大小別其事三子後皆成名長次康邵州司理有頤齋
文集仲洎乾道二年進士再調長沙丞受知辛棄疾張
杓尤器之及尹京特薦以自代

人物志

劉迂字漫翁宜黃人號巢松隱居不仕文章敏贍自成一家百氏釋老之書無不精究朱陸諸儒會鶯湖嘗以詩請益年八十餘卒有漫塘文集

林志謹案縣志據普惠禪師碑陰稱迂

爲進士

傅子雲字季魯金谿人嘗游陸九淵之門九淵守荆門使居槐堂精舍謂諸生曰吾遠守小郡不得與諸君埽清氛翳幸有季魯在時奉大對嘗曰場屋之得失窮達不與焉終身之窮達賢不肖不與焉人以爲名言嘗主甌甯簿決訟必傳經義有易傳論語集傳中庸大學解孟子指義離騷經解行於世七世孫子端讀書象山書院寶謨閣學士楊之裔妻以女遂占籍貴溪

人物志

章節夫字仲制臨川人少穎悟從陸九淵學博通諸經

嘗取朱陸辭異旨同處集而疏之名曰修和管見晚年
所守益固自號從軒著書數萬言子子先嘉定進士人
志

游元字潛夫直祕閣經之曾孫從陸九淵學深於易理
舉進士攝安化以禮義訓導邑士議減泉司鐵課以利
民邑鄰谿洞凡訟關風化必懇惻開諭再調贛縣會長
子鑾主南嶽祠因就養焉人物志

孟植字元立臨川人以浙東倉兼憲事補發累政積逋
作年糶倉鑑湖爲豪強障塞捐緡錢買安邊所蕩地千
六百畝復爲湖以利民奉祠歸號畏齋贈少保子點字
叔異以詞科仕至提領江淮茶監召除將作監兼敕令
所刪修官直祕閣人物志

鄧名世字元亞孝甫孫爲文長於敘事先是議臣廢春秋學名世獨嗜之御史劉大中宣諭江南得所著春秋四譜等書薦召命州郡錄進其書遂以布衣上殿進治人實務等說上嘉納尋賜出身除敕令所刪修官兼史館校勘先是修哲宗實錄亡元祐八年若干卷名世參考御集及日歷時政記玉牒等書補成之又編建炎以來日歷訖紹興九年爲書三百七十卷著有春秋類史列國諸臣圖國朝宰相年表古今姓氏辨證皇極大衍數大樂書合三百卷

人物志

嚴滋字泰伯臨川人從陸九淵學九淵曰始吾聞泰伯賢今觀氣象聽談論可與適道舉進士著十論叩閭晚主郴陽簿而卒有寄松窗稟守軒草錄東征襍著

林志

陳南仲字柳卿臨川人以六經授徒於鄉嘗與陸九淵
言皋陶秩禮敘典命德討罪一歸之天九德又分之爲
六爲三皆天地陰陽之道此爲明道之要九淵亦云皋
陶謨洪範呂刑在書爲傳道之書其議論相契如此志林
黎道華字師侯臨川人受春秋於鄧名世學詩於謝逸
與曾季狸僧惠嚴俱以詩名號臨川三隱性至孝母家
汝水東日一省視寒暑不輟一日春水暴漲駕小舟衝
浪而往舟已沒矣篙工手援出之人以爲純孝所致有

頤庵詩集

人物志

應屋宜黃人通經史尤精天文著天象書有圖有說有
賦名曰義府於象數之外獨得精義又有渾天左右全
體星圖黃幹爲之立石人物志

曾極字景建臨川人父滂字孟博四方宗陸氏者自滂與李德章始極志氣豪放朱子得其書及詩大異之謂其文似老蘇大蘇嘗游金陵題行宮龍屏忤時相史彌遠謫道州卒李心傳爲上言曾極久斥可念上曰非爲江湖集者邪有旨歸葬所爲詩文有春陵小雅金陵百

詠

人物志

葉季興字英叔臨川人幼聰敏日誦千言嘗取諸史百家之書著贅譚商榷今古銓品人物於是非褒貶尤嚴周必大稱其識度高明蘊蓄閎富

人物志

王克勤字叔弼臨川人淳熙二年中童子科郡卽其所居立瑞童坊入祕省讀書又登淳熙十四年第歷太常簿祕書省正字

林志

鄒安道臨川人淳熙進士官金壇丞深於易作易解發越積蘊學易者皆宗其說

人物志

鄧虎字子虎輈子爲文辨博作聖宋雅頌獻於朝又纂治圖要語上之金兵侵淮又畫策以獻皆不報築室曰清軒所著詩文甚富又有名貂如犀如者亦以文稱嘉定十六年詔取其文并晏殊王安石吳曾何異文集及羅鑑所撰羅山志入祕書省

人物志

黃仁傑字海嶽嘗著屯田議爲周必大及朱子所知子義勇字去私從朱子武夷精舍爲白鹿洞堂長黃幹嘗曰向來問學之士彫落殆盡江西則甘吉甫黃去私兄弟張元德不過數人爾弟義剛字毅然事朱子最久議論尤有根據嘗次序所聞曰先師德言次義明字景亮

師黃幹孝友慈祥待人如一日號徹齋有詩文講義

人物

志謹案縣志黃義勇傳義勇父仁傑嘗尉臨川因家焉仁傑非撫產也舊志皆入撫州姑仍之

李肅字仲欽浩子淳熙進士再調江西運司秩滿例有

送還錢卻不受當路因舉廉吏肅笑曰此足爲廉邪監文思院改衡州教授士多嚮慕齋舍無所容則闢武侯

祠以居之孫復嘉定進士

人物志

羅點字春伯崇仁人淳熙進士累遷校書郎兼國史院編修光宗卽位點以太常少卿使金會彼國有喪迫點易袍帶點執不從金人不能奪使還諭曰卿舊僚非他人比有所言毋憚啟告車駕將朝重華宮旣而中輟點奏陛下涓日過宮壽皇引領以俟常人於朋友且不可失信況人主之事親乎不聽乃求去不許壽皇崩復請

上執喪禮前後與侍從同列奏請過宮者三十五自上者十六而面奏不預焉甯宗嗣位拜端明殿學士簽書樞密院事卒年四十五贈太保諡文恭點天性孝友無矯激崖異之行義利之辨皎如日星趙汝愚嘗泣謂甯宗曰點與黃裳相繼淪謝非二臣不幸天下之不幸也

宋史

趙端頤字養正家臨川與陸伯微講貫象山之學參以伊洛諸書深有所得舉進士除淮安簿嘗入江西帥幕議不合浩然肥遯

林志

饒延年字伯永號止翁臨川人游陸氏之門自經學旁究天文地理醫卜方書真德秀等皆推服之篤性自守隱居不仕郡守欲薦於朝固辭魏了翁題其石曰有宋

長者止翁之墓

豫章書 謹案臨川縣志饒延年由崇仁彭原家臨川崇仁縣志饒應子紹定

進士應龍端平進士皆延年孫是

延年雖居臨川仍當稱崇仁人

董居誼字仁夫臨川人淳熙進士屢遷左司諫起居舍

人充金國生辰使至金會有內變悉得其國中事宜以
歸除工部侍郎竇章閣待制爲四川制置使在蜀鎮靜

不擾

林志

鄒非熊字宗望宜黃人淳熙進士令曲江平反死囚十
有二人邑人爲刻石通判邵州陞辭陳三事敷奏詳明

除廣東提刑未上而卒有竹巖集

人物志

危稹字逢吉臨川人舊名科淳熙進士孝宗更名稹調
南康軍教授服父喪免調臨安府教授倪思薦之且語
人曰吾得此一士可以報國矣丁母憂免幹辦京西安

撫司公事入爲太學錄遷諸王宮教授稹謂以教名官而實未嘗教請改創宗子學立課試法如兩學從之嘉定九年新學成改充博士升著作郎兼屯田郎官春夏不雨稹應詔言安邊所征斂之害與無罪而籍沒之害楮幣之改以一奪二鹽鈔之更以新廢舊至於沮格軍賞放散死士皆足以召怨而致旱出知潮州尋以論罷久之知漳州漳俗視不葬親爲常往往棲寄僧刹稹命營高燥地爲義冢三約期責之葬其無主名若有主名而力弗給者官爲葬之凡二千三百有奇刻石以識乞歸提舉崇熙觀與鄉里耆艾七人爲真率會卒年七十四稹性至孝父疾頗損已算益親年疾尋愈真德秀登從班舉稹自代沒又爲銘其墓所著有巽齋集諸經有

講義集解魏晉唐詩文皆有編輯先賢奏議曰玉府曰
藥山弟和字祥仲開禧進士爲上元主簿大闢祠宇祀
程顥真德秀爲之記知德興賑荒有惠政有蟾塘文集

宋史

謝志舊案危
積林志作危積謫

黃霽字彪甫臨川人歷知袁吉二州慎於用刑每決罰
稍過則感額曰吾德不足以化人故至是守兩州斷辟
囚纔二人自號靜樂居士子犖官至太府卿孫壻知肇

慶府

人物志
謹案臨川縣志霽父叔
敖戶部尚書霽自雙井徙臨川

黃榮字子仁霽姪祖澤補官知湘陰縣前宰相余端禮
爲帥謂曰君凝重如此邑雖敝不足治也歷知筠州居
家處官皆有法度二子埴墉嘉定元年同登第埴直祕
閣知建甯府

人物志

劉名世宜黃人紹熙二年知浮梁爲政簡易與民安之

安志

饒祖堯字述古臨川人博學有氣節以恩授靜江司理嘗曰仕宦未顯惟獄訟可以盡心漕司有廢卒刃其徒於野連逮甚眾祖堯廉得之遂伏辜盜起龍泉土豪多執平民爲盜祖堯悉釋之有嶠南螺川泉江橋溪等集

林志

鄔克誠字信叔樂安人慶元中以布衣詣闕上易說六卷歸闕小圃於所居之南日以文字陶練其閒一時金石之作多出其手

人物志

徐子石字勁仲臨川人慶元進士歷官鄂州錄參著外治論十三篇滿秩上之復知賀州極言制治保邦及邊

防之要改澧州卒所著有西銘章句雜著藏於家

林志

袁度字希山樂安人開禧初貢於鄉後以孔氏蝌蚪文字貢行在辭不受職蒼山曾子實稱其詩春容如褒衣

博帶淵然好古之君子

人物志

許之選字叔仁臨川人開禧進士授南雄教官時峒寇偪城守令欲棄去之選毅然率同僚修守備寇遂引去部使論薦分教連州蜀帥辟幹官薦授泰和宰秩滿士民爲立德政生祠碑

林志

李劉字公甫崇仁人嘉定進士歷禮部郎官兼崇政殿說書起居舍人遷吏部侍郎穆陵書梅亭以賜之其在蜀歷守榮眉進總漕事帥成都守本路憲四川都大茶馬等凡八印軍府僚佐各稟教令條治無不得宜所得

圖書皆以八印識之劉熟於典墳以駢儷著稱制詞爲南渡之冠所著有梅亭類彙三十卷續類彙三十卷

林志

曹錫字晉伯宜黃人嘉定進士知江山縣至官清簡吏民畏愛履畝截會令下錫知不可行籍其數封巽庫未幾議果寢除屯田員外郎乞歸奉祠真德秀嘗曰晉伯文采宜爲詞誥剛介宜作言官敏決可任監司爲作敬

思齋記

林志

李昂字季禺臨川人嘉定進士仕至彭澤令操履端方人以爲無愧於陶彭澤

林志

鄒斌字雋父臨川人嘉定丙科授德安府幕經理三關形勝措置有方端平更化趙汝談露薦不赴所居扁曰南堂叢書萬卷好學至老不衰有南堂彙

林志

陸持之字伯微九淵子七歲能爲文九淵授徒象山之
上學者數百人有未達持之爲敷繹之韓侂冑將用兵
持之憂時不憚乃厯聘時賢將有以告見徐誼於九江
時議防江持之請擇僚吏察地形孰險而守孰易而戰
孰隘而伏毋專爲江守又之鄂謁薛叔似項安世之荆
謁吳獵爭欲留之尋皆謝歸著書十篇名懋說嘉定三
年袁燮薦於朝謂持之議論不爲空言緩急有可倚仗
豫章建東湖書院連帥以書幣彊起持之爲長理宗卽
位差幹辦浙西安撫司以疾請致仕所著有易提綱諸
經雜說宋史見林志遂以爲貴溪人白志改正謹案縣志
持之弟循之從兄弟煥之九思子麟之九敘子
桓之九韶子皆能傳家學煥之子濬自有傳
陸濬字深甫九思孫開禧末朝廷罪啟兵端者欲函首

以謝濟謂失國體上書爭之吉寇狃憲使李珣檄入幕中寇平欲上功濬固辭尋登進士授饒州教官而卒

人物志

趙涯字伯泳臨川人嘉定進士提轄文思院上封事言敵勢方銳我以弱遇強爲嘗試之謀恐不特係安危且係存亡矣除監察御史首論邊防破王楫講和之謀厯工部侍郎集賢殿修撰所著有春秋集說

林志

謝公旦字清父崇仁人嘉定進士辟沿江制司機幕除監察御史兼崇政殿說書嘗論浮鹽正鹽之弊上然之除太常少卿尋除直寶章閣終福建運使有類彙奏彙六卷弟洪寶慶進士知萬安縣林字貢父嘉定進士官

至右司郎

林志 白志舊案公旦兄弟時稱崇仁三謝吳草廬有三謝逸事編序

陳一薦字叔復臨川人嘉定進士辟荆湖制幕王師復
蔡獻俘入朝有旨權均州未赴仍督府參除江西運判
召爲樞密院編修遷太府少卿終權禮部侍郎一薦久
處戎幕習兵事軍府文檄皆出其手人以陳琳方之物
志

鄧泳字德載約禮子嘉定進士爲沿江制司參議措置
江防孟珙奏功以鄧制參爲第一除太常丞知鄂州兼
沿江制置副使請祠自號巽坡
林志

畢允升字元吉臨川人有文名精於周禮嘉定進士爲
籍田令遷國子博士兼史職上封事言正君心除私意
輪對又書請納諫責實皆中時弊厯知郴韶二州以廉
稱
林志

林彥揆字子清崇仁人嘉定進士調福建常平幹官盜起汀之潭飛礮苗薶髮櫛彥揆有力焉辟爲江東帥幹嘗著時議史評及漢官考節等書尤長於聲律士多從

之

林志

程琳字奇卿臨川人寶慶進士調南雄州法曹紹定中郡命琳與摧鋒李繼周討山盜甫七日而禽二酋郡上功辟保章令而琳卒士民嗟悼列琳像於忠孝祠

林志

饒應子字定夫延年孫紹定進士權監察御史兼崇政殿說書時江西湖南北皆受兵詔淮西赴援應子行次江上手疏留兵牽制上從之或請移蹕朝堂聚議奮筆曰誰爲此謀宜斬之遷大理少卿所著有南麓集三十

卷

人物志

吳湜字持正崇仁人端平進士累遷太常丞持節湖南
北以清白爲吏師受知理宗擢廣東廉使召爲都官郎
中爲文清淡典雅學者稱自有先生

林志

張桂字德芳臨川人端平進士歷太府丞除監察御史
劾大閹李忠輔併其黨皆竄遠郡公論快之官至中大
夫封開國男

林志

饒應龍字翔夫延年孫端平進士除監察御史在臺風
力甚勁或勸其婉言應龍曰言官其可婉邪遷直顯謨
閣浙東安撫剋萬年倉以惠饑民所著有詩文類編六
十卷史討三十卷盡心錄三十卷奏藁三卷行於世

物志

詹元吉字子正樂安人淳祐進士嗜伊洛之學約而歸

於易既又歎曰易道詎止此邪聞有講說雖遠千里訪求不懈嘗語學者曰伊川言理漢上言數數外無理理外無數著書藏於家

林志

羅愚字季能點子以遺澤補官除籍田令遷湖南憲創雄楚軍以弭寇改廣西運判除鹽法害民者愚行誼純固政術循良生平召除之命十有五而辭者十有一

志

人物

陳元桂撫州人淳祐進士累官知臨江軍時聞警報築城備禦以焦勞致疾開慶元年春北兵至臨江時制置使徐敏子在龍興頓兵不進元桂力疾登城坐北門亭上督戰矢石如雨力不能敵吏卒勸之避去不從有以門廊鼓翼蔽之者麾之使去左右走遁師至元桂瞠目

叱罵遂死之縣其首於敵樓越四日方斂體色如生初親戚有勸其移治者元桂曰子亦爲浮議所搖邪時事如此與其死於饑饉死於疾病死於賊盜孰若死於守土之爲光明俊偉哉事聞贈寶章閣待制賜緡錢十萬立廟北門諡曰正節

宋史

楊揆字純父臨川人少能詞賦用故人薦出淮闕杜杲幕治法征謀多咨於揆逾年安豐被兵揆慨然曰事亟矣揆請行乃以奇策解圍奏補七官制置使孟珙辟於幕嘗用其策呼爲小子房珙嘗燕客有將校語不遜命斬之揆從容曰斬之誠是第方會客廣謀議非其時非其地也珙大服未幾有大將立功珙坐受其拜揆爲動色因歎曰大將立功庭參納拜信兜鍪不如毛錐子也

於是謝絕賓客治進士業遂登第爲潭州節度推官趙葵爲京湖制置使揆與偕行王登迓於沙市劇談至夜分揆退曰王景宋滿身是膽惜欠沈細恐終以勇敗後登死人以爲知言向士璧守峽州招之病不果行而卒

贈架閣

宋史

李進字野翁榮仁人淳祐進士福建轉運司提領戶部贍軍所主管值革命隱居澗谷種瓜植菊以終身虞集稱其詩兼簡齋放翁茶山東林之長著礪谷居愧槩人物志

曾淵子字留遠與兄鴻子同登淳祐十年第歷右正言監察御史昭文館大學士權戶部尙書浙西制置使拜同知樞密院事端宗舟遷礪州拜參知政事廣西宣諭

使鴻子字儀吉官至吏部左曹郎

人物志
子舊志列

撫州南豐

縣志稱爲
南豐人

何時字了翁樂安人文天祥同年進士也入江西轉運司幕遷臨江軍司理參軍改知興國縣天祥起兵辟署帥府機宜帶行監文思院天祥入衛時任留司吉州下時脫身歸鄉里益王立天祥開府南劍時起兵趨興國接引聚兵復崇仁縣未幾元軍奄至兵敗削髮爲僧竄迹嶺南賣卜自給自號堅白道人

宋史

陳郁字藏一崇仁人以文學受知理宗命記天竺華嚴閣留充緝熙殿應制景定閒充東宮講堂掌書兼撰述德祐乙亥卒年九十二度宗贊其像曰文窺西漢詩到盛唐侍子左右知汝忠良子世崇字伯仁隨父入宮禁

仍充東宮講堂說書兼撰述後任皇城司檢法能詩文
度宗方以卽位推恩其父子賈似道忌之遂歸所著有

隨隱漫錄

縣志

何霖字商佐樂安人景定進士理分宜訟決旬數百牒
皆盡轉衡州錄參弟希之字周佐登進士甲科所著有
雞肋集次珪字唐佐咸淳進士著有草亭漫稿深衣圖
說小學提綱菴溪羣賢詩選夢午字魯佐亦登進士第

人物志

吳名揚字叔瞻金谿人咸淳進士文天祥勤王拔置賓

幕奏除禮兵二部架閣踴躍赴義意氣傾動一時

林志謹

案金谿縣志名揚傳曰元初詔求遺逸程鉅夫薦之名
揚辭以書略曰曩從丞相文公與二三豪傑冀得少伸
大義及其無成自分一死而興朝不加苛求已爲厚幸
敢有他望從一而終臣道也不能徇舊君則亦已矣而

又苟竊新恩希圖富貴賢君相
又焉用之舊志不錄補識之

黃丙炎字純宗崇仁人咸淳進士歷官宗正簿北兵至
黃萬石棄撫州走丙炎不能挽遂歸隱劉伯宣姚燾高
凝爲憲使具禮幣迎丙炎於洪學聽其講說遣子受學
欲薦於朝固拒之子興孫字祖烈十歲能詩文丙炎歿
憲使辟興孫繼其事皆再世稱弟子翰林集賢交薦不
赴

人物志

龔孟夔字龍文臨川人咸淳進士除隆興察推兩浙運
幹洪杭事殷議幙轆轤孟夔於文法如素習決之沛然
賈似道欲見之孟夔不往左授閩幕歸有文集五十卷
外集若干卷時稱楚清先生

人物志

艾叔可字無可撫州人咸淳戊辰奏策入三等以詩文

名所著有文江集弟憲可字元德累舉不第以詩文自娛著有蕙愁吟三卷從子性字天謂闔門教授執經者盈門尤工於詩著有孤山詩集世稱三艾先生

人物志

趙嗣詔字信道崇仁人咸淳進士任紹興府司法參軍兄嗣謹亦舉進士時同邑何晉字德翁與兄桂發俱咸淳進士嗣詔與何同構別墅躬耕以食日雜樵夫牧豎中短褐行歌夜則一鐙相對講究不輟時人高之

人物志

危復之字見心臨川人博覽羣書工詩尤邃於易宋末貢補太學至元初元帥郭昂薦爲本路儒學官不就朝廷累遣奉御察罕翰林應奉詹玉以幣徵之皆不起隱於紫霞山從學者眾及卒門人私謚曰貞白先生

人物志

曾子良金谿人三歲不言伯父容安教之誦詩則點首

應語一夕見月忽能成誦及長篤志性理之學登咸淳第奉母歸養入元程鉅夫以遺逸薦不赴扁節居二字於堂以示志學者稱平山先生所著有易雜說中庸大學語孟解聖宋頌百行冠冕詩續言行錄詩廣崇類橐咸淳類橐

人物志

于應雷字震卿金谿人咸淳閒領鄉薦國亡隱居龍田里之五雲山剛直寡合非大禮未嘗一入鄰家事親孝謹爲文嚴整有法吳澄以全節銘其墓

林志 白志 舊案吳草廬集無

于應雷墓誌

黃崇義字澗西樂安人師事黃幹深造自得聘主汝水書院兵亂隱居著周易集說理學要語及澗西文集

人物志

志

甘泳字泳之崇仁人讀書不拘繩尺尤工於詩黃大山爲之序云泳之之詩一坐而役萬景片詞而括萬情用事出古書而如出異書用字出古韻而如出別韻出嶺雜言一首凡三千四百字隨事起義古今大篇未或過之云泳性剛正不與時俗俯仰平生不娶著作甚富蘄溪刊本止七百三十餘篇號東溪集

人物志

胡以遜字幼謙崇仁人咸淳登第授永福簿丁艱服闋不復仕家居以詩文自娛讀莊子怪其駁雜乃采諸家之說而斷以己意著莊子補劄十卷所著又有詩文五十卷千金裘齊瑟各二卷待問二卷

人物志

鄭松字特立亦名復樂安人三預進士貢不第以邵子經世書止於周顯德乃自庚申宋興至甲午金亡續紀

二百七十五年於邵子所紀頗有更定書法視邵尤謹其論國統絕續離合謂興國無所承亡國無所投者各爲系漢魏晉宋齊梁陳爲一系魏周隋唐晉漢周宋爲一系遼金元爲一系吳澄謂此論世儒所未及

林志

李明字壽甫崇仁人質魁聲宏面如斲玉年逾強仕值江西有變遂取古之不仕二姓者書於屋壁自號林泉隱求子人稱林泉先生卒時厓山失守曾子良銘其墓

曰宋義士云

林志

李天勇臨川人從謝枋得學爲人尙節義德祐初元將攻饒州枋得舉兵援之天勇統強壯應援大戰樂湖坪兵敗與張忠孝俱死

林志

曾斗南字明卿樂安人少孤刻苦讀書名動公卿兩貢

於鄉不偶遂無仕進意與葉苔磯曾子實趙白雲交後

學執經問字者無虛日號翠屏先生

林志

鄒次陳字周弼一字悅道宜黃人宋末中博學宏辭科遠近學者多從遊及卒何太虛哀以詩云門生定展王通學舊友誰成郭泰碑所著有遺安集十八卷史鈔十

卷

林志

王科字子純樂安人宋末貢補國學吳澄嘗曰者儒宿學如吾子純者寥寥若晨星子梁師事澄嘗築汪陂溉田千頃邑長燮理溥化郡守楊友直皆加禮敬有西齋

橐藏於家

人物志

陳祥甫樂安人國學生咸淳甲戌與同舍汪斗建楊期泰上書論賈似道誤國不報德祐乙亥文天祥開府奉

檄與弟祥霖築堡糾義偕輩信張日中屢角元兵於楮

山後隱居崇仁自號南隱

人物志 謹案崇仁縣志以爲崇仁人同時又有王道翁

亦起兵應信國後知事不就散其兵悲憤卒

婁南良字德剛臨川人咸淳進士授吉州法曹調宜黃

簿時稱練達政治與弟文輔起莘子志瀄皆以德行聞

吳澄稱臨川家世儒雅忠厚惟婁氏饒氏焉

林志

繆穆字舜賓崇仁人咸淳中以賦舉第一博記覽談論

輒傾四座遊李梅亭之門傳其詩學樂府詩律皆工吳

澄序其集復銘其墓所著詩文及書經漫鈔行於世

人物志

志

吳泳字子克崇仁人初本州解額易止取一卷泳連三

舉人服其精德祐乙亥元兵至泳不少屈遂遇害

林志

王積翁臨川人汝水東決金隄潰積翁以家財千金募築隄復固後太守趙師都葉夢得修之皆因其舊自唐初鄒稜迄明王溥李鶚屢有修隄功而積翁以獨力成之爲尤難云

府志

蕭湘樂安人由舉人任會昌知州從何時起義兵見知文天祥後兵敗湘及子姓死者三十餘人

鄒倫集
案舊志不錄

補今

江西通志卷一百五十一